

四庫全書

子部

欽定四庫全書

子部

書苑菁華卷二

詳校官中書臣孫溶

編修臣程嘉謨覆勘

總校官編修

臣

王燕緒

校對官中書

臣

李斯咏

謄錄監生

臣

陳瑞

御題書苑菁華

好惡為君宜慎哉蒐書種種挈籙來不能無彼

謂好惡

因

有此用識心存欲政推運筆諸家備傳法臚篇廿卷允

稱才

是書為宋陳思撰凡二十卷採摭秦漢以逮唐人運筆結字之法兼及法帖古刻而以諸家詩文論

及書法者附之

臨池那盡帝王事獨愛公權一語該



欽定四庫全書

子部八

書苑菁華

藝術類一書畫之屬

提要

臣等謹案書苑菁華二十卷宋陳思撰是編  
集古人論書之語與書小史相輔而行卷一  
卷二曰法卷三曰勢曰狀曰體曰旨卷四曰  
品卷五曰評曰議曰估卷六曰斷卷七曰錄  
卷八曰譜曰名卷九卷十曰賦卷十一卷十

二曰論卷十三曰記卷十四曰表曰啓卷十五曰牋曰判卷十六曰書曰序卷十七曰歌曰詩卷十八曰銘曰贊曰叙曰傳卷十九曰訣曰意曰志卷二十曰雜著所收凡一百六十餘篇以意主閎博故編次叢雜不免疎舛如序古無作叙者因蘇軾避其家諱而改本非二體昌黎集內所作皆序而非叙思乃列序叙為二目且以韓愈送高閑上人一篇載

入叙中殊無根據又晉書王羲之傳唐太宗  
稱制論斷即屬傳贊之流而思別題作書王  
羲之傳後列之雜著中尤為不知體制然自  
唐以來惟韋續墨薈兼採羣言而篇帙無多  
未為賅備其裒錄諸家緒言薈粹編排以資  
考訂實始於是編

御定佩文齋書畫譜中論書一門多採用之雖思書  
規模草創萬不及後來之精密而大輅肇自

椎輪層冰成於積水其造始之功固亦未可  
泯焉乾隆四十六年四月恭校上

總纂官

臣紀昀

陸錫熊

孫士毅

總校官

臣陸

費

墀



書苑菁華原序

古以書為名如周官掌達書名于四方儀禮百名書于策則今所謂字也是故欲知學者必先識字不識字則無以名物雖張顛草聖阿買八分猶為不識字也臨安粥書人陳思乃能集漢魏以後論書者為一編曰書苑菁華豈不可尚雖然是猶後世誇工鬪妍非吾所謂識字者君好學者又于此溯流尋源以及於秦漢而上求古人所以名之意則讀書為文也其庶乎鶴山翁題



欽定四庫全書

書苑菁華卷一

宋 陳思 撰

書法上

秦漢魏四朝用筆法

秦丞相李斯曰夫書功微妙道合自然篆籀以前眇邈  
不可得而聞矣自尚古以降太篆方行於世字皆古體  
莫測其文古遠賢哲不能詳辨斯遂刪其繁冗取其合

宜參為小篆尚未顯達其後因程氏翻隸至於鬼神晝  
哭狡兔投江自茲相效而乃興焉夫書非但裹結流快  
終藉筆力邁勁蒙恬造筆經猶用簡略變通斯意曰若  
能用筆當自流美夫用筆之法先急迴後疾下如鷹望  
鵬逝信之自然不得重改送脚若遊魚得水舞筆如景  
山興雲或卷或舒乍輕乍重善深思之此理當自見矣後  
刻諸名山碑篆玉璽銘銅人斯之下筆趙高以下咸見  
伏焉斯書聖功紀石云吾死後九百四十年間當有

一人代吾迹焉

前漢相國蕭何深善筆理與張子房陳隱等論用筆之道夫書勢法猶若登陣變通並在腕前文武遺于筆下出沒須有倚伏開閣藉於陰陽每欲書字喻如下營穩思審之方可用筆且筆者心也墨者手也書者意也依此行之自然妙矣何為殿成覃思三月以題其額觀者如流水何使禿筆書常自為之

後漢蔡伯喈入嵩山學書於石室內得素書八角垂芒

頗似篆籀馬李斯史籀等用筆勢皆得之不食三日惟  
大叫歡喜若對古人皆遂讀誦三年妙達其理用筆特  
異漢代善書者咸稱異焉皆自書五經于太學觀者如  
市歎羨不及復如會稽作筆論曰書者散也欲書先散  
懷抱任情恣性然後書之若迫於事雖中山兔毫不能  
佳也夫書先默坐靜思隨意所適言不出口氣不盈思  
沉密神彩如對至尊則無不善矣為書之體須如其形  
若坐若行若飛若動若往若來若卧若起若愁若喜若

蟲食木葉若利刀戈若強弓矢若水火若雲霧若日月縱橫有可象者方得謂之書矣

魏鍾繇少時隨劉勝入抱犢山學書三年還與太祖相鄴淳韋誕孫子荆闢枇杷等議用筆法繇忽見蔡伯喈筆法于韋誕坐上自槌胸三日其胸盡青因嘔血太祖以五靈丹救之乃活繇苦求不與及誕死繇陰令人盜開其墓遂得之故知多力豐筋者聖無力無筋者病一從其消息而用之由是更妙繇曰豈不知用筆而為

佳也故用筆者天也流美者地也非凡庸所知臨死乃從囊中出以授其子會論曰吾精思學書三十年讀他法未終盡後學其用筆若與人居畫地廣數步卧畫被穿過表如廁終日忘歸每見萬類皆畫象之繇解三色書然最妙者八分也點如山摧陷摘如雨驟織如絲毫輕如雲霧去若鳴鳳之遊雲漢來若遊女之入花林璨璨分明遙遙遠映者矣

晉衛夫人筆陣圖

按墨池編以此篇為王逸少書論後有永和四年上虞記



之語則墨池編為是然  
此等疑是唐宋人偽作

夫三端之妙莫先乎用筆六藝之奧莫若乎銀鈎昔秦  
丞相斯見周穆王書七日興歎患其無骨蔡尚書入鴻  
都觀碣十旬不返嗟其出羣故知達其源者少闇于其  
理者多近代以來殊不思古而緣情棄道纔記姓名或  
學不該瞻聞見又寡致使成功不就虛費精神自非通  
靈感物不可與談斯道今刪李斯筆妙更加潤色總七  
條并作其形容列事如左貽諸子孫永為模範庶將來

君子時復覽馬筆要取崇山絕仞中兔毛八九月收之  
其筆頭長一寸管長五寸鋒齊腰長者其硯取煎涸新  
石潤澁相兼浮津耀墨者其墨取廬山松烟代郡之鹿  
膠十年以上強如石者為之紙取東陽魚卵虛柔滑淨  
者凡學書字先學執筆若真書去筆頭二寸一分若行  
草書去筆頭三寸一分執之下墨點畫波屈曲皆  
須盡一身之力而送之若初學先大書不得從小善鑒  
者不寫善寫者不鑒善筆力者多骨不善筆力者多肉

多骨微肉者謂之筋書多肉微骨者謂之墨猪多力豐筋者聖無力無筋者病一一從其消息而用之

一 如千里陣雲隱隱然其實有形

、 如高峰墜石磕磕然實如崩也

ノ 陸斷犀象

乙 百鈞弩發

丨 萬歲枯藤

、 崩浪雷奔

丁

勁弩筋節

右七條筆陣出入斫斬圖執筆有七種有心急而執筆  
緩者有心緩而執筆急者若執筆近而不能緊者心手  
不齊意後筆前者敗若執筆遠而急急前筆後者勝又  
有六種用筆結構圓滿如篆法飄颻洒落如章草凶險  
可畏如八分窈窕出入如飛白耿介特立如鶴頭鬱拔  
縱橫如古隸然心存委曲每為一字各象其形斯造妙  
矣書道畢矣永和四年上虞製記

王右軍題衛夫人筆陣圖後

夫紙者陣也筆者刀稍也墨者鍔甲也水硯者城池也  
本領者將軍也心意者副將也結構者謀略也颺筆者  
吉凶也出入者號令也屈折者殺戮也夫欲書者先乾  
研墨凝神靜思預想字形大小偃仰平直振動令筋脉  
相連意在筆前然後作字若平直相似狀如算子上下  
方整前後齊平此不是書但得其點畫耳昔宋翼常作  
此書翼是鍾繇弟子繇乃叱之翼三年不敢見繇即湔

心改迹每作一波常三過折筆每作一點常隱鋒而為之每作一橫畫如列陣之排雲每作一戈如百鈞之弩發每作一點如高峰墜石屈折如銅鈎每作一牽如萬歲枯藤每作一放縱如足行之趨驟翼先來書惡晉太康中有人于許下破鍾繇墓遂得筆勢論翼乃讀之依此法學名遂大振欲真書及行書皆依此法若欲學草書又有別法須緩前急後字體形勢狀等龍蛇相鈎連不斷仍須稜側起伏用筆亦不得使齊平大小一等每

作一字須有點處且作餘字總竟然後安點其點須空中  
遙擲筆作之其草書亦復須篆勢八分古隸相雜亦  
不得急令墨不入紙若急作意思淺薄而筆即直過惟有  
章草及章程行押等不用此勢但用擊石波而已其擊  
石波者缺波也又八分更有一波謂之隼尾波即鍾公  
太山銘及魏文帝受禪碑中已有此體夫書先須引八  
分章草入隸字發人意氣若直取俗字不能先發義之  
少學衛夫人書將謂大能及渡江北遊名山比見李斯

曹喜等書又之許下見鍾繇梁鵠書又之洛下見蔡邕  
石經三體書又於從兄洽處見張昶華岳碑始知學衛  
夫人書徒費年月耳羲之遂改本師仍于衆碑學習焉  
遂成書爾時年五十有三或恐風燭奄及聊遺教于子  
孫耳可藏之石室千金勿傳非其人也

王羲之筆陣圖

夫書者玄妙之伎也若非通神志士學無及之大抵書  
須存思余覽李斯等論筆勢及鍾繇書骨甚是不輕恐



子孫不記故敘而論之

夫書字貴平正安穩先須用筆有偃有仰有欹有斜或  
小或大或長或短凡作一字或類篆籀或似鵠頭或如  
散隸或近八分或如蟲食木葉或如水中科斗或如壯  
士佩劍或似婦女纖麗欲書先構筋力然後裝束必注  
意詳雅起發縣竈踈濶相間每作一點必須懸手作之  
或作一波抑而後曳每作一字須用數種意或橫畫似  
八分而發如篆籀或豎牽如深林之喬木而屈折如鋼

鈎或上大如枯桿或下細如鍼芒或轉側之勢似飛鳥  
空墜或稜側之形如流水激來作一字橫豎相向作一  
橫明媚相承第一須存筋藏鋒減迹隱端用尖筆須落  
鋒混成無使毫露浮怯舉筆爽爽若神即不求于點畫  
瑕玷也為一字数體俱入若作一紙之書須字字意別  
勿使相同若書虛紙用強筆若書張紙用弱筆強弱不  
等則蹉跌不入凡書貴乎沉静今意在筆前字居心後  
未作之始結思成矣仍下筆不用急故須遲何也筆是

將軍故須遲重心欲急不宜遲何也心是箭鋒不欲遲遲則中物不入夫字有緩急一字之中何者有緩急止如鳥字下手一點點須急橫直皆須遲欲鳥之脚大須急斯乃取形勢也每書欲十遲五急十曲五直十藏五出十起五伏乃可為書若直筆急牽裹此暫視似書久味無力仍須用筆著墨不過三分不得深浸毛弱無力墨用松節同研久久不動彌佳矣

王羲之筆勢論十二章并序

羲之告子敬曰吾察汝書性過人乃未閑規矩父不親教自古有之略修筆勢論一篇開汝之悟凡斯字勢總有十二章章有指歸定其模楷詳其舛謬撮其要實錄其便宜或變體處多罕臻其本轉筆處衆莫識其源懸針垂露之蹤難為體制揚波騰氣之迹足可迷人故辨其由堪愈膏肓之疾今書樂毅論一本及筆勢論一篇貽爾藏之必勿播于外緘之秘之不可示諸知友窮研篆籀省功而易成纂集精專形彰而勢顯有意學之者

兩月即見其功大無性靈者百日亦知其本此之筆論  
可謂家寶家珍學者秘之世有名譽筆削久矣始克有  
成研精覃思考諸規矩存其要錄吾作此論初成之時  
同學張伯英欲求見之吾詐云失矣蓋自秘之甚不苟  
傳也

創臨章第一

夫紙者陣也筆者刀稍也墨者兵甲也水研者城池也  
本領者將軍也心意者副將也結構者謀策也颺筆者

吉凶也出入者號令也屈折者殺戮也點畫者磊落也  
戈旆也斬斫也放縱者快樂也着筆者調和也頭角者  
威棱也始書之時不可盡其形勢一遍正脚手二遍少  
得形勢三遍微微似本四遍加其遒潤五遍兼加抽拔  
如其生澁筆下不滑不可便休三行兩行一度創臨惟  
須筆滑不得計其遍數

啟心章第二

夫欲學書之法先乾研墨凝神靜慮預想字形大小偃

仰平直振動則筋脉相連意在筆前然後作字若平直相似狀如算子上下方整前後齊平此不是書但得其點畫耳昔宋翼乃鍾繇弟子嘗作是書繇乃叱之遂三年不

敢見繇即潛心改迹每作一波常三過折每作一點常隱鋒而為之每作一橫畫如列陣之排雲每作一戈如百鈞之弩發每作一點如危峰之墜石屈折如鋼鈎每作一牽如萬歲之枯藤每作一放縱如足行之趨驟然如驚蛇之透水激楚浪以成文似虬龍之蜿蜒謂其妙

也若鸞鳳之徘徊言其勇也擺撥似驚雷掣電此乃飛  
空妙祕頃刻沉浮統攝鏗鏘啟發厥意能使昏迷之輩  
漸覺勝心博識之流顯然開朗

視形章第三

視形象體變貌猶同逐勢瞻顏高低有趣分均點畫遠  
近相須描布研精調和筆墨鋒纖往來踈密相附鐵點  
銀鈎方圓周正起筆下筆忖度尋思引說蹤由永傳今  
古知者榮身益世方懷浸潤之深愚者不俟佳談如暗



塵之視錦坐而知之發憤學而悟者忘食此乃妙中增  
妙新中更新金書錦字本領為先盡說安危務以平穩  
為本分間布白上下齊平均其體制大小尤難大字促  
之貴小小字寬之貴大自然寬猛得所不失其宜橫則  
正如孤舟之橫小渚豎則直若春筍之抽寒谷也

說點章第四

夫着點皆磊磊似大石之當衢或如蹲鴟或如科斗或  
如瓜瓣或如栗子存若鵝口尖如鼠屎如斯之數各稟

其儀但獲少獲多學者開悟

處戈章第五

夫斫戈之法落筆戔戔如長松之倚溪谷似欲倒也似  
百鈞之弩初張處其戈意妙理難窮放似弓張箭發收  
似虎鬪龍躍直如臨谷之勁松曲類懸鈞之釣水稜層  
切于雲漢倒載殞如山岬天門騰而地戶耀四海謚而  
五嶽封玉燭明而日月蔽綉綵亂而錦紋翻夫以屈脚  
之法彎彎如角弓之張見鳥為鳥之類是也

健壯章第六

夫立人之法如鳥之在樹丫丫之類是也踠脚之法如壯士之屈臂鳳飛凡氣之例是也急引急牽如雲中之掣電日月目因之例是也踠脚非幹上捺下撚終始折轉悉令和均勿使蜂腰鶴膝放縱宜存氣力視筆取勢行中廓落如勇士申鈞方剛對敵麒麟鬪角虎奏龍牙筋節弩拳勇身精健放法如此書進有功矣牽引深妙皎在目前發動精神提撕志意挑剔精思秘不可傳夫作右邊折

角疾牽下微開左畔幹轉令取登對勿使腰中傷慢視  
筆取勢直截向下趨義常存無不惺悟

教悟章第七

凡字處其中畫之法皆不得到其左右相復宜粗于  
左左畔橫貴乎纖豎貴乎粗分間布白遠近宜均上下得  
所自然平穩當須遞相掩蓋不可孤露形影及出于其  
鋒展轉翻筆之處即宜察之而用之

觀彩章第八

夫臨文用筆之法復有數勢並悉不同或有藏鋒者大

藏鋒在于腹內而起

側筆者乏

亦不宜抽細而且緊

抽筆者人

從腹起而抽之又云利道

而牽掣即合也

結筆者撮

漸次相疾必殆然矣

憩筆者俟失

筆

之勢視其長短俟失石脚須次也

息筆者逼逐

息之勢向上久上久而緊抽矣

感筆者

將

威即捺角也將謂下筆要得所不宜劣畫也緩長不宜短

戰筆者合舍

戰陣也緩不宜長含

快吐及短也

厥筆者成機

促抽上勿使長厥謂其美也視形勢成機是臨時而成最妙處

帶

筆者盡

細抽也帶視回轉走勿賒下筆勢之法人之類裝束身體字含鮮潔起有輟者也盡為其著復及

也

翻筆者先光

翻轉筆勢急而短疾

疊筆者時寺

緩

宜起筆者不下

於腹內舉勿使露筆起正取勢令不失節

打筆者廣度

打廣而就

狹廣快健又不宜遲及修補也

### 開腰章第九

夫作字之勢飾甚為難鋒銛來去之則及復還往是之法在乎精熟尋察然後下筆作ノ字不宜遲、不宜纔而脚不宜賒腹不宜促又不宜斜角不宜峻作稜角二字合為一體

並不宜闊

重不宜長車不宜小腹不宜大密勝乎踈短勝乎長

節制章第十

夫學書作字之體須遵正字之形勢不得上寬下窄

如是

則是頭重尾輕不相勝任

不宜傷密密則似病瘵纏身

不舒展也

復不宜

傷疎疎則似溺水之禽

諸處傷慢

不宜傷長長則似死蛇掛樹

腰枝無力

不宜傷短短則似踏死蝦蟆

言其闊也

此乃大忌可不

慎歟

察論章第十一

臨書安帖之方至妙無窮或有迴鸞返鵲之飾變體則

于行中或有生成臨谷之戈虬龍踐于紙上徹筆則鋒  
烟雲起如萬劍之相成落紙則裨揩施張蹙踏江波之  
錦若不端嚴手指無以表記心靈吾務斯道廢寢忘食  
懸歷歲華乃今稍稱矣

譬成章第十二

凡學書之道有多種焉初業書要類乎本緩筆定其形  
勢忙則失其規矩若擬目前要急用之厥理難成但取  
形質快健手腕輕便方圓大小各不相犯莫以字小易



而忙行筆勢莫以字大難而慢展毫頭如是則筋骨不  
等生死相混儻一點失所若美人之病一目一畫失節  
如壯士之折一肱子樂毅論一本書為家寶學此得成  
自然皆達勿以難學而自惰焉

唐虞世南筆髓論

敘體

文字經藝之本王政之始也蒼頡象山川江海之狀蟲  
蛇鳥獸之迹所為六體戰國政異俗殊書文略別秦魏

多門約為八體筆病訛謬凡五易焉並不述用筆之妙  
及乎蔡邕張索之輩鍾繇衛王之王流皆造意精微自悟  
其道也

辨應

心為君妙用無窮故為君也手為輔承命竭股肱之用  
故也力為任使纖毫不撓尺丈有餘故也管為將帥處  
運用之道執生殺之權虛心納物守節藏鋒故也毫為  
士卒隨管任使跡不凝滯故也字為城池大不虛小不孤

故也

指意

須手腕輕虛虞安吉云夫未解書意者一點一畫皆求象本乃轉自取拙豈成書邪太緩而無筋太急而無骨側管則鈍慢而多肉豎管直鋒則乾枯而露骨終其悟也麤而不鈍細而能壯長而不為有餘短而不為不足

釋真

筆長不過六寸捉管不過二寸真一行二草三指實掌

虛右軍云書弱紙強筆弱筆強紙強者弱之弱者強之  
遲速虛實若輪扁斲輪不徐不疾得之于心應之于手  
口所不能言也拂掠輕重若浮雲蔽于晴天波擊勾截  
若微風搖于碧海氣如奔馬亦如柔鉤輕重出于心而  
妙用應乎手然則體約八分勢同章草而各有所趨無問  
巨細皆有虛散其鋒圓毫絕按轉易也真書一體篆草  
章行八分等當覆腕上搶掠毫下開牽撒撥趯鋒轉行  
草稍助指端鉤鉅轉腕之狀矣

釋行

行書之體略同于真至于頓挫磅礴若猛獸之搏噬進退鉤距若秋鷹之迅擊故覆腕搶毫乃按鋒而直引其腕也則內拓外旋結鋒而環轉結者上感旋毫不絕內轉鋒也如以掉筆聯毫若璽瑕自然之理亦如長空游絲容曳而來往又如蟲網絡壁勁而復虛羲之云游絲斷而復聯皆契以天真同于輪扁又云每作點畫皆懸管掉之令其鋒開自然勁健也

釋草

草則縱心奔放覆腕轉蹙懸管聚鋒柔毫外拓左為外  
右為內伏連卷收攬吐納轉藏鋒也既而舞袖揮拂而  
縈紆又如垂藤膠盤而繚繞蹙旋轉鋒亦如騰猿過樹  
逸蚪得水輕騎追虜烈火燎原或氣雄而不可抑或勢  
逸而不可止縱狂逸放不違筆意也羲之云透嵩華兮  
不高逾懸壑兮能越或連或絕如花亂飛若雄強逸意  
不副亦何益矣但先緩引興心逸自急也仍接鋒而取

興興盡則已又生撥鋒任毫端之奇象兔絲之縈結轉  
別利角多鈎篆體或如蛇形或如兵陣故兵無常陣字  
無常體矣謂如水火勢多不足故曰字無常定也

契妙

欲書之時當收視反聽絕慮凝神心正氣和則契于妙  
心神不正書則欹斜志氣不和字則顛仆其道同魯廟  
之器虛則欹滿則覆中則正正者冲和之謂也然字  
雖有質術本無為稟陰陽而動靜體萬物以成形達性

通變其常不主故知書道玄妙必資神遇不可以力求也必須心悟不可以目取也字形者如目之視也為目有止限明執字體既有質滯為目所視遠近不同如水在方圓豈由乎水且筆妙喻水方圓喻字所視則同遠近則異故明執字體也字有態度心之暢也心悟非心合手妙也且如鑄銅為鏡明非匠者之明假筆傳心妙非毫端之妙必在澄心運思至微妙之間神應思徹又如鼓瑟輪指妙響隨意而生握管使鋒逸態逐毫而應



學者心悟於至道書則契於無為苟涉浮華終懵於斯

理也

按墨池編此處有勸學一章共八章此書以勸學另為一篇在第二十卷

書苑菁華卷一

欽定四庫全書

書苑菁華卷二

宋 陳思 撰

書法下

叙筆法

學書之初執筆為最蓋明位置點畫便于墨道也須其  
良師口授天性自悟縱橫落紙筆無虛發即能專成其  
勢大約虛掌實指平腕堅鋒意在筆前鋒行畫內心想

字形輕重斜正各得其趨切須襟懷沉靜自然思過半矣待其功成即轉勢况殊不可榻橫寫樣輕自取拙若槁行雜體掇筆往來懸管自在但取體勢雄壯不可拘其小節若畏懼生疑否臧不決運用速于筆前振動感於手下師心固乎獨見弟子執其寡聞恥請問於智人忌藝能之勝已若欲造玄未之有也禁經云有功無性神彩不生有性無功神彩不變兼此二事然後得齊古人之景氣又云第二識勢第三裹束必三者兼備然後

為書苟守一途即為未得張懷瓘云揖讓禮樂繇不及  
義風神散逸義不及獻證之於書籍其神彩也李嗣真  
云今之馳騫去聖逾遠徒識方圓而迷點畫猶莊生之  
嘆盲者易象之談日中終不見矣唐太宗與漢王元昌  
褚遂良等皆受之於史陵然褚首師虞後又學史乃謂  
陵曰此法更不可以教人是其妙處也陸東之受之於  
虞世南世南受之于智永皆有體法今人皆不聞師範  
又自無鑒局雖古蹟昭然永不覺悟而執燕珉以為寶

玩楚鳳而稱珍不亦謬哉褚河南云良師不遇歲月徒  
往今之能者時見一斑忽不悟者終身瞑目蓋書非口  
傳手授而云能知者未之見也今取諸家筆法刪除叢  
脛共得二十篇分為二卷學者其師之

翰林密論二十四條用筆法

點點法口訣云作點向左以中指斂頓向右以大指齊  
頓作報荅便以中指挫鋒須收鋒在內按筆而收之衄  
側下其筆含濡其鋒摩論簇心然收筆慎在圓平禁經

云點如利鑽鏤金是也又半蟻法宜字上用之為避其  
傍點又側下筆使墨精闇墜徐乃反揭則稜利矣右軍  
云作點之法皆須落落如大石當衢又云點不變為布  
綦要通變也又有打點單以指送筆似打物之勢甚難  
用也

一畫法口訣云作橫畫皆用大指遣之若作策法即指  
擡筆上若作勒法即用中指鉤筆澁進覆盡以中指頓  
筆然後以大指遣至盡處此三勢相近用法不同也鱗

勒法須仰收禁經云畫如長錐界石是也又緊走仰收似長舟截小渚也兩頭勢起使芒角不失遒潤惜勢不策不鱗勒梢須收之取古勁枯澁無求活利凡在字上宜用之擡筆法初緊策中擡中鋒輕勁微勒向石按衄古經云鍾書宗示字長畫又云畫不變為布算行草書勢云須嶮露鋒飛動為勝

三三畫法口訣云上潛鋒平勒中背筆仰策下緊趯覆收名遞相解摘古經云黃庭三闕字用草法上衄側中



策下奮筆橫飛名速相聳峙以峻利為勝

一懸針法口訣云鋒須先發逐勢行趯筆緊收澁進如  
錐畫石禁經云懸針如長錐綴地是也又契字下雙筆  
頭一弩一垂變換用之三勢不同或垂或趯或外掠而  
中弩右軍云懸針垂露為體制衛夫人云如萬歲枯藤  
臨池訣云懸針法蘭亭年字盡其勢也

一垂露法口訣云鋒管齊下勢盡殺筆縮鋒又始築筆  
而極力終注鋒而作弩又垂不縮此言頓筆以推挫為

功右軍云豎如筍抽寒谷是也臨池訣云垂露本篆脚名玉筋如古釵倚物也

乙背拋法口訣云蹲鋒緊掠徐擲之速則失勢遲則緩怯臨池訣云此鍾法稍涉八分歐陽詢守而不替薑蕙法引過其曲轉蹲其鋒又徐收而蹲趯之不欲出須暗收使其如負芒刺則善右軍云援毫蹲節輕重自佳是也庾肩吾書論曰欲拋而還置為駐鋒而後趯之也  
八抽筆法口訣云左輦掠須峻利右潛趯而戰行待勢

卷而機駐揭摘出而暗收若便拋必流滑凡淺又側起  
平發緊殺按波為抽筆從腹內起庾肩吾書論曰將放  
更留又人字第二筆云攙引抑拽是也夫木等亦同用  
人背趯法口訣云悉以中指遣至盡處以無名指拒而趯  
之又潛鋒閣勒勢盡然後趯之右軍背趯戈法上則俯而  
過下則曲而就蓋所以失之於前正之於後也古經云鍾  
書哉字用又永禪師溢出戈法下以無名指築上借勢以中  
指遣之至下以無名指衄鋒潛趯此名禿法張旭折芒法潛

鋒緊走意盡乃收而趯之鍾書常用也右軍云落戈之法我我如長松倚谿谷唐文皇云為戈必開貴遲凝而右頤是也章草潛按微進輕揭闇趯夫揭欲利按欲輕輕則骨勁神清肥乃質滯鈍俗王濛能之

シ散水法口訣云上衄則中偃下潛挫趯鋒古經云黃庭樂毅論同用柳宗元筆精賦云散水幽縱黃庭宗之是也臨池訣云或藏或露狀類不同意要遞相顯異若頻有則兩點相近而下點當高此名潛相矚視外雖解摘

內相附屬為上中潛鋒闇劔下峻趯捷遣此蓋鍾法也  
行書勢微按而鈎揭以輕利為美

冰法口訣云上側覆殺下築而趯之須相承揖若竝  
連劔側輕揭則牽字右左用之草法須勢借捷遣若緩  
滯則為病也

烈火法口訣云劔鋒闇按臨池訣云須各自立勢抵  
背潛劔所為視之不見攷之則彰右經云鍾書然字用  
聯飛法口訣云闇微駐輕揚潛趯筆鋒連綿相顧

不絕也禁經云聯飛雁陣當秋是也古經云樂毅論燕然字又虞永興兼字用其半勢蓋中斷也

山顯異法口訣云上點駐鋒右左挫鋒橫畫按筆勢須相順古經云出告誓文實字之六上點側橫畫勒左擡筆擺鋒右峻啄輕揭出告誓文容字之六虞永興常守行法以圓峻飛動為美章草法擬於圓峻飛動其於峻策務在露鋒鈎裏忌於緩滯也

之平磔法口訣云不遲不疾戰筆側去勢卷不可便出

須駐筆而沒放禁經云磔磔如生蛇渡水是也又鍾元常每作磔筆須三過折故文皇云為波必磔貴三折而遺毫

丁勾裏法口訣云圓角趯鋒作弩法勢未盡而趯之顏魯公云勾法用筆如紙下行是也岡岡向字等用

丁勾弩法口訣云圓角激鋒待筋骨而成要如武人屈臂右軍云迴角不用峻及有稜是也衛夫人名之勁弩法勾均物等字用

小奮筆法口訣云左側而獨立中衄揭而右鈎古經云  
鍾書宣示字下用若中豎則左右閤衄而潛趯又簇鋒  
捷進為系字下三點也

多杉法口訣云上平點中啄下衄側

外臂法口訣云左唆掠中潛鋒衄挫右蹲鋒外擲

一豎擡法口訣云擡筆豎策挫鋒下上緊直當尚字中

豎畫用

八曾頭其脚法口訣云左潛揭而右啄曾頭用左啄右



側則其脚用之

暗築法口訣云馭鋒直衝有點連物則名暗築月其字內兩點是

今衮筆法口訣云須按鋒上下感衄之令今等字是

縮出法口訣云上磔縮鋒下磔出之此八分法也蓋避雙出也又戈字上縮鋒作弩下出鋒作趯張云戈如束棘是也

### 永字八法

禁經云八法起於隸字之始自崔張鍾王傳授所用該於萬字墨道之最不可不明也隋僧智永發其指趨授於虞秘監世南自茲傳授彰厥存焉李陽冰云昔逸少上書遂歷多載十五年中偏攻永字以其八法之勢能通一切也八法者永字八畫是矣

、 一點為側      二 二橫為勒

丿 三豎為弩      ㇀ 四挑為趯

㇁ 五左上為策      ㇂ 六左下為畧

永 七右上為啄 永 八右下為磔

訣一

側蹲鴟而墜石 勒縱緩以藏機

弩彎環而勢曲 趯峻快以如錐

策依稀而似勒 畧彷彿以宜肥

啄騰凌而速進 磔憶昔以遲移

訣云

側不愧卧 勒常患平

弩過直而力敗

趯宜存而勢生

策仰收而暗揭

畧左出而鋒輕

啄倉皇而疾掩

礫趯趯以開撐

側勢第一

側不得平其筆當側筆就右為之口訣云先右揭其腕  
次輕蹲其鋒取勢緊則乘機頓挫借勢出之疾則失中  
過又成俗夫側鋒顧右借勢而側之從勁輕揭潛出務  
於勒也

問曰側不言點而言側何也

論曰謂筆鋒顧右審其勢險而側之故右側也止言點則不明顧右無存鋒向背墜墨之勢若左顧右側則橫敵無力故側不險則失於鈍鈍則芒角隱而書之神格喪矣筆訣云側者側下其筆使墨精暗墜徐入及揭則稜利矣

勒勢第二

勒不得卧其筆中高兩頭下以筆心壓之口訣云頭傍

鋒仰策次迅收若一出揭筆不趯而暗收則薄圓而踈  
筆鋒以及紙須微進仰策峻趯

問曰勒不言畫而言勒何也

論曰勒者趯筆而行承其虛畫取其勁澁則功成矣今  
止言畫者慮在不趯一出便畫則鋒單而怯薄也夫勒者  
藉於堅趯則筆勁澁亡其流滑庶可稱上矣筆訣云  
策筆須勒仰筆覆收准此則形勢自彰矣

弩勢第三

弩不宜直其筆直則無力立筆左偃而下最須有力又云須發勢而卷筆若折骨而爭力口訣云凡傍卷微曲處筆累走而進之直則縱勢失力滯則神氣怯散大弩須側鋒顧右潛趯輕挫其揭

問曰畫字中心豎畫也今謂之弩何也

論曰弩者勢微弩曰弩在乎趯筆下行若直置其畫則形圓勢質書之病也筆訣云弩筆之法豎筆徐行近左引勢勢不欲引直直則無力矣

趯勢第四

趯須蹲鋒得勢而出出則暗收又云前畫卷則別斂心而出之口訣云傍鋒輕揭借勢勢不勁筆不挫則意不深趯與挑一也鋒貴于澁出澁出期于倒收所謂欲提還置也夫趯自弩出潛鋒輕挫借勢而趯之

問曰凡字之出鋒謂之挑今更為趯何也

論曰挑者語其小異而其體一也夫趯者筆鋒去而言之趯自弩筆下殺筆趯起是也法須挫衄轉筆出鋒佇



思消息則神蹤不墜矣

策勢第五

策須斫筆背發而仰收則背斫仰策也兩頭高中以筆心舉之口訣云仰筆潛鋒似鱗勒之法揭腕趯勢于右潛鋒之要在畫勢暗捷歸于右也夫策筆偃仰鋒豎趯微勁借勢峻碩于掠也

問曰策一名折異畫今謂之策何也

論曰策之與畫理亦故殊仰筆趯鋒輕擡而進故曰策

也若及紙便畫不務遲澁面背偃仰者此備畫完成耳  
筆訣云始築筆而仰策徐轉筆而成形是也

掠勢第六

掠者拂掠須迅其鋒左出而欲利又云微曲而下筆心  
至卷處口訣云撇過謂之掠借于策勢以輕駐鋒右揭  
其腕加以迅出勢旋於左法在澁而勁意欲暢而婉遲  
留則傷于緩滯夫側鋒右出謂之掠

問曰掠一名分發今稱為掠何也

論曰掠乃徐疾有準手隨筆遣鋒自左出取勁險畫而為即發則一出運用無的故掠之精旨可守矣夫掠之筆趨意欲留而必勁又孫過庭書譜云遣不常遠明矣筆訣云從策筆下左出而鋒利不墜則自然佳

啄勢第七

啄者如禽之啄物也立筆下輒須疾為勝又云形似鳥獸卧斫斜發亦云卧必筆疾輒右出口訣云右向左之勢為卷啄按筆蹲鋒潛蹙于右借勢收鋒迅擲旋右須

精險剝去之緩滯大筆鋒及紙為啄在潛勁而啄之  
問曰撇之與啄同出異名何也

論曰夫撇者蒙俗之言啄者因勢而立故非妄飾貽誤  
學者啄用輕勁為勝去浮怯重體為上考之遠源或不  
妄耳筆訣云啄筆速追勁若鐵石則勢成也

磔勢第八

磔者不疾不徐戰而去欲卷復駐而去之又云趯筆戰  
行翻筆轉下而出筆磔之口訣云右送之波皆名磔右

揭其腕逐勢緊趯傍筆迅磔盡勢輕揭而潛暗收在勁  
迅得之夫磔法筆鋒須趯勢欲險而混得勢而輕揭暗  
收存勢候其勢盡磔之

問曰發波之筆今謂之磔何也

論曰發波之法循古無蹤源其用筆磔法為經磔毫聳  
過法存手神而磔之義明矣凡磔若左顧右則勢鈍矣  
趯重鋒緩則勢肥須遒勁而遲澁之凡險勁風骨泥滯  
存亡以法師心以志專本則自然闇合旨趣矣筆訣云

始入筆緊築而微仰便下徐行勢足而後磔之其筆或藏鋒出鋒由心所好也

唐張懷瓘論用筆十法

偃仰向背

謂兩字併為一字須求點畫上下偃仰離合之勢

陰陽相應

謂陰為內陽為外斂心為陰展筆為陽須左右

相應

鱗羽參差

謂點畫編次無使齊平如鱗羽參差之狀

峰巒起伏

謂起筆蹙衄如峰巒之狀殺筆亦須存結

真草偏枯

謂兩字或三字不得真草合成一字謂之偏枯

須求映帶字勢雄媚

邪正失則

謂落筆結字分寸點畫之法須依位次

遲澁飛動

謂勒鋒磔筆字須飛動毫無凝滯之勢是得

嵌空玲瓏

謂因認識字行草用筆不依前後

尺寸規度

謂不可長有餘而短不足須用筆至盡處則字



有凝重之態

隨字變轉

謂蘭亭歲字三筆作垂露其上年字則變懸針  
又其間一十八箇之字各別其體

翰林家論云凡攻書之門有十二種隱筆法即是遲筆  
疾筆逆筆順筆澁筆倒筆轉筆過筆提筆啄筆輟筆趯  
筆並用筆死生之法在於幽隱遲筆法在於疾疾筆法  
在於遲逆入倒出取勢加功諒候調停偏宜寂靜其

於得妙須在功深草草求玄終難得也凡書通則變者則王變白雲體歐變右軍體柳變歐陽體至于永禪師褚遂良顏真卿李邕虞世南等並是書中得仙手皆得法後自變其體以傳後世故俱得其名也若執法不變縱能入木三分亦被號為奴書終非自立之體是書家之大要又筆意云書學之難神彩為上形質次之兼之者便到古人以斯而言豈易多得必使心忘于筆手忘于書心手遺情書不忘想要在求之不得考之即彰

也

翰林禁經九生法

一生筆純毫為心軟而復健

二生紙新出篋笥潤滑易書即受其墨若久露風日枯燥難用

三生硯用則貯水畢則乾之司馬云硯石不可浸潤  
四生水義在新汲不可久停不堪用也

五生墨隨要施研凝利筆墨光為上研多則泥鈍也

六生手適攜執勞腕則無準

七生神凝神靜思不可煩燥

八生目寢息適寤光朗分明

九生景天氣清朗人心舒悅乃可言書也

右此九法不可廢忘忽而怠之則其瑕矣

唐歐陽詢八法

如高峰之墜石

似長空之初月

一 如千里之陣雲

丿 如萬歲之枯藤

乙 勁松倒折落掛石崖

ノ 利劍截斷犀象之牙

ㄣ 一波常三過筆

フ 如萬鈞之弩發

澄神靜慮端已正容秉筆思生臨池志逸虛掌直腕指  
齊掌空意在筆前文向思後分間布白勿令偏側墨淡

則傷神彩墨濃必滯鋒毫肥則為鈍瘦則露骨勿使傷  
于軟弱不須怒降為奇點畫調勻上下均平還相顧揖  
筋骨精神隨其大小不可頭輕尾重無令左短右長斜  
正如人上稱下載東映西帶氣宇融和精神洒落省此  
微言孰為不可也歐峰閣下方岩識

書苑菁華卷二

欽定四庫全書

子部  
書苑菁華卷三  
四

詳校官中書臣孫溶

編修臣程嘉謨覆勘

總校官編修臣王燕緒

校對官中書臣李斯咏

謄錄監生臣陳瑞

欽定四庫全書

書苑菁華卷三

宋 陳思 撰

書勢

晉衛恒著四體書傳并書勢

衛恒字巨山少辟司空齊王府轉太子舍人尚書郎秘書丞太子庶子黃門郎恒善草隸為四體書勢云昔在黃帝創制造物有沮誦倉頡者始作書契以代結繩蓋



覩鳥迹以興思也因而遂滋則謂之字有六義焉一曰指事上下是也二曰像形日月是也三曰形聲江河是也四曰會意武信是也五曰轉注老考是也六曰假借令長是也夫指事者在上為上在下為下象形者日滿月虧象其形也形聲者以類為形酌以聲也會意者止戈為武人言為信也轉注者以老為壽考也假借者數言同字其聲雖異文意一也自黃帝至於三代其文不改及秦用篆書焚燒先典而古文絕矣漢武帝時魯共

王壤孔子宅得尚書春秋論語孝經時人已不復知有古文謂之科斗書漢世秘藏希有見者魏初傳古文者出於邯鄲淳恒祖敬侯寫尚書後以示淳而淳不別至正始中立三字石經轉失淳法因科斗之名遂效其形太康元年汲縣人盜魏襄王冢得策書十餘萬言按敬侯所書猶有彷彿古書亦有數種其一卷論楚事者最為工妙恒竊悅之故竭愚思以贊其美愧不足以廁前賢之作冀以存古人之象焉古無別名謂之字勢云

黃帝之史沮誦倉頡眺彼鳥迹始作書契紀綱萬事  
垂法立制帝典用宣質文著世爰暨暴秦滔天之戾  
大道既泯古文亦滅魏文好古世傳丘墳歷代莫發  
真偽靡分大晉開元弘道敷訓天垂其象地耀其  
文天地乃位燦美其章因聲會意類物有方日處君  
以盈其度月執臣而虧其旁雲委蛇而上布星離離  
以舒光木莽蓐以垂穎山嵯峨而連崗蟲跂跂其若  
動鳥飛飛而未揚觀其措筆綴墨用心精專聲和體

均發止无間或守正循檢矩折規旋或方圓靡則因  
事制權其曲如弓其直如弦矯然特出若龍騰于川  
嶽爾下頽若雨墜于天或引筆奮力若鳴鵠高飛邈  
邈翩翩或縱筆娥娜若流蕪懸羽靡靡綿綿是故遠  
而望之若翻風厲水清波漪連就而察也有若自然  
信黃唐之遺迹為六藝之所先籀篆盡其子孫隸草  
乃其曾玄觀物象以致思非言辭之所宣

昔周宣王時史籀始著大篆十五篇或與古同或與古

異世稱謂之籀書也及平王東遷諸侯立政家殊國異而文字乖形秦始皇帝初兼天下丞相李斯乃損益之奏罷不合秦文者斯作倉頡篇中車府令趙高作爰歷篇大更令胡毋敬作博學篇皆取史籀大篆或頗省改所謂小篆者或曰下邳人程邈為衙吏得罪始皇幽繫雲陽十年從獄中作大篆少者增益多者損減方者使圓圓者使方奏之始皇始皇善之出為御史使定書或曰邈所定乃隸字也自秦壞古文有八體一曰大篆二

曰小篆三曰刻符四曰蟲書五曰摹印六曰署書七曰  
殳書八曰隸書王莽時使司空甄豐校文字部改定古  
文復有六書一曰古文即孔子壁中書也二曰奇字即  
古文而異者也三曰篆書即秦篆書也四曰佐書即隸  
書也五曰繆篆所以摹印也六曰鳥書所以書幡信也  
及漢祭酒許慎撰說文用篆書為正以為體例最新可  
得而論也秦時李斯號為工篆諸山及銅人銘皆斯書  
也漢建初中扶風曹喜善篆小異于斯而亦稱善邯鄲

淳師焉畧究其妙韋誕師淳而不及也太和中誕為武  
都太守以能書留補侍中魏氏寶器銘題皆誕書也漢  
末又有蔡邕為侍中郎將善篆採斯喜之法為古今雜  
形然精密閑理不如淳也邕作篆勢云

因鳥遺跡皇頡循聖作則制斯文體有六篆焉真形  
要妙巧入神域龜文鍼裂櫛比龍鱗紆體放尾長短  
覆身頓若黍稷之垂穎蘊若龍蛇之棼縕揚波振壑  
鷹跖鳥振延頸脅翼勢若凌雲或輕筆內投微本濃

末若絕若連似水露緣絲凝垂下端從者如懸衡者  
如編杳眇斜趨不方不圓若行若飛跂跂踈踈遠而  
望之若鴻鵠羣游絡繹遷延迫而視之端際不可得  
見指撫不可勝原研桑不能索其詰屈離婁不能覩  
其隙間盤倂揖讓而辭巧籀誦拱手而韜翰處篇籍  
之首目粲斌斌其可觀擣筆艷于紉素為學藝之範  
閑嘉文德之宏懿蘊作者之莫刊思字體之俛仰舉  
大畧而論旃



秦既用篆奏事繁多篆事難成即令隸人佐書曰隸字  
漢因用之獨符璽幡信題署用篆隸者篆之捷也上谷  
王次仲始作楷法至靈帝好書時多能者而師宜官為  
最大則一字經丈小則方寸千言甚於其能或時不持  
錢詣酒家飲因書其壁顧觀者酌以酒直計錢足而減  
之每書輒削而焚其柎梁鵠乃益其柎而飲之酒候其  
醉而竊其柎鵠卒以書至選部尚書宜官後為表術將  
令鉅鹿宋子有耿球碑是術所立其書甚工云是宜官

書也梁鵠奔劉表魏武帝破荊州募求鵠鵠之為選部也武帝欲為洛陽令而以為北部尉故懼而自縛詣門署軍假司馬在祕書以勤書自効是以今者多有鵠手迹魏武帝懸著帳中及以釘壁玩之以為勝宜官今宮殿題署多是鵠書鵠宜為大字邯鄲淳宜為小字鵠謂淳得次仲法然鵠之用筆盡其勢矣鵠弟子毛弘教于祕書今八分皆弘之法也漢末有左子邑小與諱鵠不同然亦有名魏初有鍾胡二家為行書法俱學之於劉

德昇而鍾氏小異然亦各有其巧今盛行于世作隸勢云

鳥迹之變乃惟佐隸蠲彼繁文從此簡易厥用既工  
體象有度煥若星陳爵若雲布其大經尋細不容髮  
隨事從宜靡有常制或穹窿恢廓或櫛比鍼裂或砥  
平繩直或蜿蜒繆戾或長邪角趣或規循矩折修短  
相副異體同勢奮筆輕舉離而不絕纖波濃點錯落  
其間若鍾簏設張庭燎飛烟蘄岩嵯峨高下屬連似

崇臺重宇層雲冠山遠而望之若飛龍在天近而察  
之心亂目眩竒姿譎詭不可勝原研桑所不能計宰  
賜所不能言何草隸之足算而斯文之未宣豈體大  
之難覩將祕奧之不傳耶聊佇思而詳觀舉大教而  
論旃

漢興而有草書不知作者姓名至章帝時齊相杜伯又  
號稱善作後有崔瑗崔實亦皆稱工杜氏殺字甚安而  
書體微瘦崔氏甚得筆勢而結字小踈弘農張伯英者

因而轉精其巧凡家之衣帛必書而後練之臨池學書池水盡墨下筆必為楷則常曰匆匆不暇草書寸紙不見遺至今世尤寶其書韋仲將謂之草聖伯英弟文舒者次伯英又有姜孟穎梁孔遠田彥和及韋仲將之徒皆伯英之弟子有名於世然殊不及文舒也羅叔景趙元嗣者與伯英同時見稱于西州而矜此自與衆頗惑之故伯英自稱上比崔杜不足下方羅趙有餘河間張趙亦有名然雖與崔氏同州不如伯英之得其法也崔

瑗作草勢云

書契之興始自頡皇寫彼鳥蹟以定文章瑗暨末業  
典籍彌繁時之多僻改之多權官事荒蕪剿其墨翰  
惟作佐隸舊字是刪章草之法益又簡畧應時諭指  
周旋卒迫兼功并用愛日省力純儉之變豈必古式  
觀其法象俛仰有儀方不中矩圓不副規抑左揚右  
兀若竦竒獸跼鳥跂志則飛移狡兔暴駭將奔未馳  
或黥黥黼黼狀似連珠絕而不離畜怒怫鬱放逸生

奇或凌遽惴慄若據槁臨危旁點邪附似蜩蟬揭枝絕  
筆收執餘綖糾結若山蜂施毒著隙緣臈騰蛇赴穴  
頭沒尾垂是故遠而望之推焉若阻岑崩崖就而察  
之一畫不可移機要微妙臨時從宜畧舉大較彷彿  
如斯

索靖敘草書勢

聖王御世隨時之宜蒼頡既生書契是為科斗鳥篆類  
物象形睿哲變通意巧滋生損之隸草以崇簡易百官

畢修事業並麗蓋草書為狀也宛若銀鈎漂若驚鸞舒  
翼未發若舉復安蟲蛇蚪鰥或往或還類婀娜以羸形  
剡豐奮而桓桓及其逸遊盼蠻乍正乍邪騏驎暴怒逼  
其轡海水宏隆揚其波芝草蒲葑還相繼棠棣融融載  
其華玄熊對踞于山嶽飛燕相追而差池舉而察之又  
似乎和風吹林偃草扇樹枝條順氣轉相比附窈繞康  
苦隨體散布紛擾擾以倚靡中持凝而猶豫玄螭狡獸  
嬉其間騰猿飛鼪相奔趣凌魚奮尾蛟龍反據投空自



竄張設牙距或若登高望其類或若既往而中預或若  
倜儻而不羣或若自檢于常度于是多才之英篤藝之  
彥役心精微耽思文憲守道兼權觸類生變離析八體  
靡形不判去繁存微大象未亂上理開元下周謹按騁  
辭放手雨行冰散高音翰厲溢越流漫忽班班而成章  
信奇妙之煥爛體磊落而壯麗姿光潤以粲粲命杜度  
運其指使伯英回其腕著絕勢于紈素誠百世之殊觀

書狀

晉中書令王珣行書狀

遯乎嵩岱之峻極爛若列宿之麗天偉字挺特奇書秀  
出揚波騁藝餘好宏逸虎踞鳳峙龍伸蠖屈資胡氏之  
壯傑兼鍾公之精密總二妙之所長盡安美乎文質詳  
覽字體尋究筆迹粲乎偉乎如珪如璧宛若蟠螭之仰  
勢翼若翔鸞之舒翮或乃飛筆放體雨集風馳綺靡婉  
婉縱橫流離

闕

梁武帝草書狀

案此篇墨池編題作草書勢朱長文云張彥遠以草書勢為右

軍作然篇中有二王父子等語以此言之蓋  
表昂等作也今陳思直以為梁武帝作不知  
何  
据

昔秦之時諸侯爭長簡檄相傳望烽走駟以篆隸之難  
不能救速遂作赴急之書蓋今草書是也其先出自杜

氏以張為祖以衛為父索范者伯叔也二王父子可為  
兄弟薄為庶息羊為僕隸目而叙之亦不失倉公觀鳥  
迹之措意邪但體有疎密意有倜儻或有飛走流注之  
勢驚竦峭絕之氣滔滔閑雅之容卓犖調宕之志百體  
千形而呈其巧豈可一概而論哉皆古英儒之撮撥豈  
羣小皂吏所能為因為之狀曰迅疾若驚蛇之失道遲  
若淥水之徘徊緩則鴟行急則鵲厲抽如雉啄點如兔  
擲乍駐乍引任意所為或麓或細隨態運奇雲集水散

風迴電馳及其成也麋而有筋似蒲萄之蔓延女蘿之  
繁縈澤蛇之相絞山熊之對爭若舉翅而不飛欲走而  
還停狀雲山之有玄玉河漢之有黑星厥體難窮其類  
多容婀娜如削弱柳聳拔如裊長松婆娑而飛舞鳳宛  
轉而起蟠龍縱橫如結聯綿如繩流離似綉磊落如陵  
嶂嶂瞿瞿奕奕翩翩或卧而似倒或立而似顛斜而復  
正斷而還連若白水之遊羣魚叢林之掛騰猿狀衆獸  
之逸原陸飛鳥之戲晴天狀烏雲之罩恒岳紫霧之出

衡山巉岩若嶺血脉如泉文不謝于波瀾義不愧于深淵傳志義于君子報歎曲于人間蓋略言其梗槩未足稱其要妙焉

### 書體

#### 五十六種書并序

韋

續按墨池編作韋續纂

自三皇以前結繩為正至太昊氏文字生焉所謂體類象形謂之文形聲相依謂之字著于竹帛謂之書書者以代結繩之政也故字有六體一曰象形日月是也二

曰指事上下是也三曰形聲江河是也四曰會意武信是也五曰轉注考老是也六曰假借令長是也又曰字有五易蒼頡變古文史籀制大篆李斯制小篆程邈制隸書漢代作章草是也其八體者更加刻符摹印蟲書署書爰書傳信并大小篆為八體也後漢東陽公徐安于搜諸史籀得十二時書皆象神形也又加二十三體共定五十有六列之于後

一太昊庖犧氏獲景龍之瑞始作龍書

二炎帝神農氏因上黨羊頭山始生嘉禾八穗作  
八穗書用頒行時令

三黃帝史蒼頡寫鳥迹為文作篆書

四黃帝時因卿雲作雲書

五少昊金天氏以鳥紀官作鸞鳳書文章衣服取  
象古文

六科斗書因科斗之名故飾之以形不知年代或  
云顓頊高陽氏所制今古文是也



七帝學高辛氏以人紀事象仙人形書車器衣服  
皆為之

八帝堯陶唐氏因軒轅靈龜負圖作龜書

九夏后氏象鐘鼎形為篆作鐘鼎書

十殷湯時仙人務光作倒薤書今薤葉篆是也

十一周文王史佚因騶虞作虎書有虎不害人名

騶虞因此始也

十二周文王時赤雀啣書集戶武王時丹鳥入室

以二祥瑞故作鳥書

十三周法魚書因素鱗躍入舟所作亦曰漢武帝遊昆明池學陳遵所作

十四填書周媒氏所作魏韋誕用題宮闕王廙王隱皆好之也

十五大篆書周宣王時史籀所作也亦曰籀篆石鼓文是也

十六複篆亦史籀作漢武帝用題建章閣

十七爻書伯氏所職文記笏武紀爻因而制之

十八小篆周時所作漢武帝得汾陰鼎即其文也

十九仙人篆古之所有李斯善辨古文宇改為篆

形也

二十麒麟書魯西狩獲麟仲尼反袂拭面稱吾道

窮矣弟子由為素王紀瑞所製也

二十一轉宿書宋司馬熒感退舍所作也象蓮花

未開形

二十二蟲書魯秋胡婦浣蠶所作亦曰雕虫篆

二十三傳信鳥跡書六國時書節為信象鳥形也

二十四細篆書李斯摹寫始皇碑序皆用此體亦

曰繆篆

二十五小篆書李斯刪古文作也始皇以祈禱名

山皆用此書

二十六刻符書鳥頭雲脚李斯趙高竝善之用題

印璽

二十七古隸書秦程邈獄中變大篆所作始皇嘉  
焉拜侍御史名徒隸之書今為八分

二十八徒隸之書因程邈幽囚為徒隸書也邈字

元岑

二十九署書漢蕭何所作用題蒼龍白虎二闕

三十藁書行草之文也董仲舒欲言災異主父偃

竊而奏之晉衛瓘索靖善之亦云相聞之用也

三十一氣候時書漢文帝令蜀郡司馬長卿採日

辰禽屈伸之體升伏之狀象四時為書也

三十二芝英書六國時各以異體為符信所製也  
三十三漢武代有靈芝三植于殿前遂歌芝房之  
曲因述焉又名靈芝

三十四金錯書古之錢銘用之泉府漢之銖兩刀  
布所製也

三十五尚方大篆程邈所述後人飾之以為法焉  
三十六鶴頭書與偃波皆詔版所用漢家尺一之

簡是也亦名鵠頭

三十七偃波書即版書狀如連紋謂之偃波

三十八蚊脚書尚書詔版用之其字側纖垂下有  
似蚊脚因而為名

三十九垂露篆漢章帝時曹喜所作也

四十懸針篆亦曹喜所作有似針鋒因而名之用

題五經篇目

四十一章草書漢齊相杜伯度援藁所作因章帝

所好名馬韋誕謂之草聖

四十二飛白書蔡邕待詔見門下吏堊帚成字所作

四十三一筆書弘農張芝臨池所製其狀崎嶇有循環之趣

四十四八分書漢靈時上谷王次仲所作魏鍾繇謂之章程書

四十五蛇書魯人唐綜當漢魏之間夢蛇繞身寤而



卷三  
作之

四十六行書正之小偽也鍾繇謂之行狎書

四十七散隸書衛恒所作迹同飛白

四十八龍爪書晉王右軍所作形如龍爪也

四十九橐及行隸鍾繇變之義獻重焉

五十二王重變行隸及橐體為八體書

五十一草書王羲之飾古亦甚善也

五十二虎爪書王僧虔擬龍爪所作也

五十三鬼書宋元嘉中京口有人震死臂上有篆  
似八分也今曰雷書

五十四外國胡書阿馬鬼魅王之所授其形似小  
篆

五十五天竺書梵王所作涅槃經所謂四十二章  
經也

五十六花書河東山盾所作

成公綏隸書體

倉頡作文因物措思觀彼鳥迹遂成文字燦矣成章閱  
之後嗣存載道德紀綱萬事俗所傳述實由書紀時變  
巧易古今各異蟲篆既繁草篆近偽適之中庸莫尚于  
隸規矩有則用之簡易隨便適宜亦有弛張操筆假墨  
抵押毫芒彪煥磔砢形體抑揚芬葩連屬分簡羅行爛  
若天文之布曜蔚若綿繡之有章或輕拂徐振緩按急  
挑挽橫引從左牽右繞長波鬱拂微勢縹眇工巧難傳  
善之者少應心隱手必由意曉爾乃動纖指舉弱腕握

素紬染玄翰彤管電流雨下電散點點折拔掣挫安案  
繽紛絡繹紛華粲爛綢緼卓犖一何壯觀繁縟成文又  
何可玩章周道之郁郁表唐虞之耀煥若乃八分璽法  
殊好異制分白賦墨基布星列翹首舉尾直刺邪掣繯  
繆結體劓衫奪節或若虬龍盤游蛭蟬軒翥鸞鳳翱翔  
矯翼欲去或若鷲鳥將擊并體抑怒良馬騰驤奔放向  
路仰而望之鬱若宵霧朝升游烟連雲俯而察之漂若  
清風厲水漪瀾成文垂象表式有模有楷形功難詳粗

舉大體

書旨

唐虞世南書旨述

客有通玄先生好求古迹為余知書啟之發源審以臧  
否曰予不敏何足以知之今率以聞見隨紀年代考究  
興亡其可為元龜者舉而敘之古者畫卦立象造字設  
教爰寫形象肇乎蒼史仰觀俯察鳥迹垂文至于唐虞  
煥乎文章暢于夏殷備乎秦漢洎周宣王時史籀循科斗

之書採蒼頡古文綜其遺失別署新意號曰籀文或謂大篆秦丞相李斯改省籀文適時簡要號曰小篆善而行之其倉頡象形傳諸典策世絕其迹無得而稱其籀文小篆自周秦以來猶或參用未之廢黜或刻以符璽或銘于鼎鐘或書之旌鉞往往人間時有見者夫言篆者傳也書者如也述事契誓者也字者孳也孳乳蔓多者也而根之所由其來遠矣先生曰古人籀篆曲盡而知之愧無隱焉隸草攸止今則未聞願以發明用祛昏

感曰至若程邈隸體因之罪隸以名其書朴畧而微歷  
禊增損亟以湮淪而淳喜之流亦稱傳習首變其法巧  
拙相汨未之超絕史游制于急就創立草藁而不之能  
崔杜析理雖則豐妍潤色之中失于約簡伯英重以省  
繁飾之銛利加之奮逸時言草聖首出常倫鍾太傅師  
資德昇馳驚曹蔡倣學而致一體真楷獨得精妍而前  
輩數賢遞相矛盾事則恭守無捨儀則尚有瑕疵失之  
斷割逮乎王廙王洽逸少子敬剖析前古無所不工八

體六文必揆其理符于衆美會滋簡易制成今體乃窮  
奧旨先生曰於戲三才審位日月獨明固資異人一數  
而化不然者何以臻妙無相奪倫文子聯聯軌範後昆  
先生曰書法玄微其難品繪今之優劣神用無方小學  
疑迷惕然將寤而旨述之義其可聞乎曰無讓繁詞敢  
以終序



書苑菁華卷三